

△^{戊六}禪定功德二^{己一}標章^{己二}舉經^{己三}釋義。

今初

次說第六大人禪定功德。

△^{己二}舉經。

經曰。汝等比丘。若攝心者。心則在定。心在定故。能知世間生滅法相。是故汝等。常當精勤修習諸定。若得定者。心則不散。譬如惜水之家。善治堤塘。行者亦爾。為智慧水故。善修禪定。令不漏失。是名為定。

△^{己三}釋義二^{庚一}示定法^{庚二}明治障^{庚三}顯成就。

今初

論曰。大人禪定功德者。謂八種禪定等。因攝念生故。如經。汝等比丘。若攝心者。心則在定故。云何攝心。能生禪定。示現攝遍所行處。心行對治緣故。次及中軟取事。心行對治緣故。此二種緣處。對治成時。則近禪定故。禪定成就。有方便果用故。如經。心在定故。能知世間生滅法相故。

第六功德定法中。初通示。禪是梵言。此翻為棄。棄五蓋等惡故。^{從滅惡翻。}或翻功德叢林。^{從生善翻。}

或翻思惟修。^{從行翻也。}華梵兩標。故云禪定。八種謂四禪四空。從色無色天。以為名數。皆為厭

下忻上。次第增勝。故有八矣。論云八種禪定。則知禪定二名互通。或云四禪八定。則禪局而定通。準法界次第云。四禪四空。則二名並局。學者知之。初色界四天定。名為四禪。而名根本禪者。以神通觀慧諸禪三昧。悉從四禪中生。三界勝定。無復過此。三乘行人。善巧照了。則因此定。發真無漏。外道無智慧。入此定時。不壞色身。直滅其心。入無想定。謂為涅槃。是為邪倒。無色四天定。名為四空。行入厭色如牢獄。樂出色籠。故修此定。體無形色。故總名空。一空處定。滅色緣空。與一識處定。虛空無邊。緣多定破。捨破。三世之識無邊。緣多定虛空相應故。二識處定。虛空無邊。緣多定破。捨破。三世之識無邊。緣多定虛空相應故。三無所有處定。虛空無邊。緣多定破。捨破。三世之識無邊。緣多定虛空相應故。四非有想非無想定。厭無所有處如癡。有想處如癡。捨無所有處樂。緣非有無想法故也。凡夫外道。亦得此定。謂證涅槃。斷一切想。言非有想。佛弟子如實。知有細想。依四陰而住。故云非無想。邪正得失。合而立名。須知二定。凡外通修。今經所勸。並謂發真。出離生死。昇沈自異。如上可知。因攝念生者。躡前段也。云何下牒釋。遍所行處心。即分別見也。中軟取事心。即貪愛也。一切煩惱根本。不出見愛。見是堅執。愛即柔軟。故云中軟。此二種心。無非粗散。並用數息對治。即發禪定。故云近也。禪定成就者。定成是果。慧發是果上方便之用故。能洞知一切法相。智者云。既得禪定。心無所依。泯然凝寂。一心在定。猶如明鏡不動。淨水無波。湛然而照。萬法像現是也。

△^{庚二}明治障^{辛一}通示^{辛二}別釋。今初

又懈怠無修習方便障故。如經是故汝等常當精勤修習諸定故。

次明治障通示中。由無方便。故多懈怠。禪定不成。即是障礙。所以經中勸勤修習。諸定即上八種。

△^{辛二}別釋。

是中懈怠有三種。一者不安穩懈怠。二者無味懈怠。三者不知恐怖懈怠。云何修習一一對治。示現精進修習。節量食臥。及調阿那波那故。精勤修習。覺知諸定。有通慧功德。及盡苦源故。大希有事故。精進修習。觀察生老病死苦。及四惡趣苦。我未能離故。是三障對治故。

別釋中初列障。云何下明治。初二句總徵。示下隨釋。初治不安穩。由不善調心。故起懈怠。節量食臥是調身。阿那波那是調息。並為入定方便。天台云。欲界粗散。非數不治。故須調息。是入定之要。阿那云入息。波那云出息。亦云安那般那。音小異耳。安般守意經云。安之言生。般之言滅。即出入息也。凡欲修者。先當攝心。諦想於息。有聲曰風。結滯曰氣。出入不盡曰喘。無聲不滯。出入俱盡曰息。或數出息。或數入息。隨宜無在。但從一至十。中無間雜。即是法成。或忘或散。還從一數。則粗亂

靜息。心禪停住。末世馳散。正當修習。如南山淨心誠觀。天台法界次第廣之。須者自尋。不能煩引也。次治無味。由不知功勝。故生懈怠。通謂神通。慧即智慧。盡苦源即解脫。具上三種。故大希有。三治不知恐怖。由不觀諸苦。故生懈怠。四相是現苦。四趣是來苦。修羅報勝。或在善趣。然同鬼類。故列惡中。我未離者。示可怖故。是下一句。通結可知。

△_{庚三}顯成就。

復示修習功德成就。無所對治故。如經。若得定者。心則不散故。又以譬喻。示善修功德。上上增長故。如經應知。

三中言成就者。釋得定也。無對治者。釋心不散也。又下釋譬喻。經中初二句舉喻。行者下合法。善修功德。謂定成也。上上增長。謂智慧不漏失也。

△_{戊七}智慧功德二_{己一}標章。二_{己二}舉經。三_{己三}釋義。今初

次說第七。大人智慧功德。

△_{己二}舉經。

經曰。汝等比丘。若有智慧。則無貪著。常自省察。不令有失。是則於我法中。能得解脫。若不爾